

28-11-2025

आकाशवाणी

खास-खास खबर-

1. प्रधानमंत्री नरेन्द्र मोदी कर्नाटक ते गोवा दा दौरा करंगन। मुख धार्मिक मुद्दे पर चर्चा करंगन ते 77 फुट दी श्री राम जी दी मूर्त दा पर्दा गोआइंगन।
2. राष्ट्रपति द्रौपदी मुरमू अज्ज लखनऊ च भारत Scouts and Guides दे 19में राष्ट्रीय जंबूरी गी सम्बोधित करंगन।
3. UGC नै उच्च शिक्षा संस्थानें गी समें-सिर इम्तेहान ते डिग्री जल्दी जारी करने गी यकीनी बनाने लेई आखेया ऐ।
4. 56मां IFFI 2025 अज्ज गोवा च सम्पन्न होग।
5. हांग-कांग अपार्टमेंट च अगग लग्गने कन्नै मरने आहलें दी गिनतरी बढियै 94 होई। 280 थमां मते लोक अजें बी लापता न।
6. तूफान Ditwah दे उत्तरी तमिनाडू च औने करी भारी बरखा दी मेद कीती जा रदी ऐ।

<><><><><><>

PM Visit – Karnataka-Goa

प्रधानमंत्री नरेन्द्र मोदी होर अज्ज कर्नाटक ते गोवा दे दौरे पर रौहंगन। मोदी होर कर्नाटक दे Udupri च श्री कृष्ण मठ जांगन ते लक्ष कंठ गीता पारायण कार्यक्रम च हिस्सा लैंगन। ओह कृष्ण गर्भगृह दे सामने स्थित सुर्वेण तीर्थ मंडप दा बी उदघाटन करंगन ते पवित्र कनकना किंदी आस्तै कनक कवच समर्पित करंगन। मगरा प्रधानमंत्री होर सारधा पंचाष्टमोत्सव दे मौके पर गोवा च श्री संस्थान गोरण परतगली जीवोत्तम मठ दे 550 में बरे सरबन्धी समारोह च हिस्सा लैंगन। प्रधानमंत्री होर मठ च कैह कन्नै बनी दी राम हुंदी 77 फुट उच्ची मूर्ति थवां बी पर्दा गोआइंगन। ओह रामायण थीम पार्क गार्डन दा बी उदघाटन करंगन। इस मौके प्रधानमंत्री होर उत्थे मौजूद लोकें गी सम्बोधित बी करंगन ते विशेष डॉक टिकट ते स्मारक सिक्का जारी करंगन।

<><><><><><>

PM -Chhattisgarh

प्रधानमंत्री नरेन्द्र मोदी कल्लै थवां छत्तीसगढ़ दे दो-दिन दे दौरे पर रौहंगन। इस दौरान प्रधानमंत्री पुलस महानिरीक्षकें दे 60में अखिल भारतीय सम्मेलन च हिस्सा लैंगन। मोदी होर विशिष्ट सेवा

आस्तै राष्ट्रपति पुलस पदक बी प्रदान करगंन। त्रै-दिन दा एह सम्मेलन अज्जै थमां रायपुर च शुरु होग। इसदा मकसद पुलस चुनौतियें दे हल च होई दी प्रगति दी समीक्षा करना ते विकसित भारत दे नजरिए मूजब सुरक्षित भारत दे निर्माण दी रूपरेखा तयार करना ऐ। सम्मेलन च गृहमंत्री अमित शाह राष्ट्रीय सुरक्षा सलाहकार अजीत डोभाल ते गृह राज्य मंत्री Bandi Sanjay Kumar होर शामिल होगंन।

<><><><><><>

Chhatisgarh –Conference

पुलिस डायरेक्टरस जनरल ते इंस्पेक्टरस जनरल दी 60मीं अखिल भारतीय कांफ्रेंस अज्ज छत्तीसगढ़ दे नवा रायपुर च शुरु होग। प्रधानमंत्री नरेन्द्र मोदी 29 ते 30 नवम्बर गी होने आली इस त्रै-दिन दी कांफ्रेंस च शामिल होगंन। केन्द्रीय गृहमंत्री अमित शाह- राष्ट्रीय सुरक्षा सलाहकार अजीत डोभाल- गृह राज्यमंत्री- बकख-बकख राज्यें ते केन्द्र शासित प्रदेशें दे पुलस डायरेक्टरस जनरल ते केन्द्रीय पुलस संगठन दे प्रमुख इस सम्मेलन च शामिल होगंन। इस बरे दा विषय ऐ- “विकसित भारत-सुरक्षा दे पैहलू”।

<><><><><><>

President- Lukhnow

राष्ट्रपति द्रौपदी मुर्मू होर अज्ज लखनऊ दा दौरा करगंन- जित्थे ओह 2 कार्यक्रमें च हिस्सा लैगंन। राष्ट्रपति होर ब्रह्म कुमारियें दे कार्यक्रम च हिस्सा लैगंन। राष्ट्रपति होर भारत स्काउट्स एंड गाईड्स दे हीरक जयंति समारोह च बी हिस्सा लैगंन ते 19में नैशनल Jamboree गी सम्बोधित करगंन। मगरा राष्ट्रपति होरें भारत स्काउट्स एंड गाईड्स दे हीरक जयंति समारोह गी सम्बोधित करगंन। 61 बरे मगरा एह कार्यक्रम लखनऊ च होआ रदा ऐ। मुख्य भरै थवां 33 हजार स्काउट्स- गाईड्स- रोवर्स ते रैंजर्स इसदे च हिस्सा लैगंन। इसदे च एशिया Pacific क्षेत्र दे 15 सौ युवा डेलिगेट्स हिस्सा लैगंन। इसदे च मालद्वीव- नेपाल-श्रीलंका ते साउदी अरबिया शामिल ऐ।

<><><><><><>

UGC -Timely Exams

विश्व विद्यालय अनुदान आयोग नै उच्च शिक्षा संस्थानें दे समें पर इम्तेहान आयोजित करने ते उपाधियां ते प्रमाण-पत्र तौले जारी करने दा निर्देश दिता ऐ। आयोग नै आखेया ऐ जे इसदे च चिर करी विद्यार्थियें दे मौके दा नुक्सान हुंदा ऐ ते उनेंगी सेई ते गुणवत्तापूर्ण रोजगार हासिल करने च रुकावट औंदी ऐ। आयोग नै आखेया ऐ जे विद्यार्थी नतीजें घोषित होने दे 180 दिनें दे अंदर-अंदर

डिग्री हासिल करने दा बी हक्कदार ऐ। एह बी आखेया गया ऐ जे नियमें दी पालमा नई करने दी स्थिति च आयोग दंडात्मक कारवाई करोग।

<><><><><><>

IFFI

56मां अंतराष्ट्रीय फिल्म फेस्टिवल ऑफ इंडिया (IFFI) 2025 अज्ज गोवा च इक बड्डी क्लोजिंग सेरमनी कन्नै सम्पन्न होई जाग- जेदे च मशहूर एक्टर धर्मेन्द्र होरें गी श्रद्धांजलि दिती जाग। 20 नवम्बर गी शुरु होए दे इस फेस्टिवल च 81 मुखें दी 240 थमां मती फिल्मां दस्सी गेइयां- जेदे च दुनिया भर दे सिनेमा दी सब्भनैं थमां शैल फिल्मां दस्सियां गेइयां। इस दौरान शेखर कपूर- राज कुमार हिरानी- आमिर खान-रमेश सिप्पी- मुजफ्फर अली- नागार्जुन जनेह फिल्मी जगत दे लोकें अपनी राय दिती।

<><><><><><>

Hong Kong -Fire

हांग-कांग च इक अपार्टमेंट काम्पलैक्स च लग्गी अग्न च मरने आहलें दी गिनतरी बढियै 94 होई गेई ऐ। 280 थमां मते लोक लापता न। अधिकारियें चेतावनी दिती ऐ जे एह गिनतरी होर बढी सकदी ऐ कीजे कैई लोक अजें बी ईमारत च फंसे दे न। कुल 76 लोक एहदे च जख्मी दस्से जा रदे न।

<><><><><><>

Putin -Ukraine

रुस दे राष्ट्रपति ब्लादिमीर पुतिन होरें आखेया ऐ जे यूक्रेन च युद्ध खत्म करने दी अमरीका दी योजना- भविष्य दे समझौते दी बुनियाद बनी सकदी ऐ। पुतिन होरें किर्गिस्तान दे दौरें दौरान रिपोटरें कन्नै गल्लबात करदे होई कल एह गल्ल आकखी। उनें आखेया जे क्रेमलिन अगले हफ्ते दी शुरुआत च मॉस्को च खास दूत स्टीव विटकॉफ हुंदी अगुआई च अमरीकी प्रतिनिधिमंडल दे कन्नै गंभीर चर्चा दी मेद करा रदा ऐ। पुतिन होरें आखेया जे रुस उल्लै गै हथियार सुट्टोग- जिल्लै यूक्रेन दे सैनिक- मॉस्को दे दावे आले इलाके थमां हटी जाग।

<><><><><><>

Cyclonic Storm

चक्रवात दित्वा उत्तर पच्छिम बंगाल दी खाड़ी सोया तमिनाडू- पुडुचेरी ते आंध्र-प्रदेश दे तटीय इलाके आहली पेठा बदा रदा ऐ। इसदे कन्नै मुल्खै दे पूर्वी तटवर्ती इलाके च पैहली दिसम्बर तगर मोलाधार बरखा होने दी मेद ऐ। मुल्खै दे दक्खनी राज्यें च बी इस दौरान गरज कन्नै बरखा होने दा अनुमान ऐ। बंगाल दी खाड़ी दे दक्खनी -पच्छमी हिस्सें मनार दी खाड़ी ते कन्याकुमारी दे आले-दोआले दे क्षेत्रें च सोमवारें तगर मछेरे गी समुन्द्र च नई जाने दी सलाह दिती गई ऐ। पम्बन- थुथुकुडी- नागापट्टिणम- कराईकल- चेन्नेई ते कुड्डालोर बंदरगाहें पर तूफान सरबन्धी जानकारी दिती गई ऐ। दक्खनी तटवर्तीय इलाकें दे किश हिस्सें च बरखा दी संभावना ऐ। तमिनाडू दे उत्तरी हिस्सें च अगले 3 दिन च तेज बरखा दा अनुमान ऐ।

<><><><><><>

Football U-17 Asia Cup

फुटबाल च भारत अज्ज गुजरात दे अहमदाबाद च EKA एरिना च AFC अंडर-17 एशियन कप सऊदी अरब-2026 क्वालिफायर ग्रुप-डी मुकाबले च लेबनान कन्नै मुकाबला खेडोग। एह मैच संजा 7:30 बजे होग। ग्रुप-डी प्वाइंटस टैबल च भारत अजे 4 प्वाइंटस कन्नै दुए नम्बर पर ऐ। सिर्फ ग्रुप विजेता गै अगले बरे AFC Under -17 एशियन कप सऊदी अरब लेई थाहर बनावंग।

<><><><><><>

PM Blind Cricket Team

प्रधानमंत्री नरेन्द्र मोदी होरें टी-20 विश्व कप विजेता महिला दृष्टिबाधित क्रिकेट टीम कन्नै मलाटी कीती। प्रधानमंत्री होरें सोशल मीडिया पोस्ट च इस बारे दस्सेया। महिला टीम नै प्रधानमंत्री मोदी होरें गी दस्तखत कीते दा इक Bat बी भेंट कीता। भारतीय टीम नै नेपाल गी 7 विकेटे कन्नै हराया। प्रधानमंत्री होरें आखेया जे खडारियें उन्दे कन्नै प्रेरक अनुभव सांझा कीते।

<><><><><><>

Read by : **Vikas Khajuria**
Stand by : **Shruti Khajuria**
D.E.O. : **Rajni Devi**
Skilled : **Rajat Paul**
Editor : **Abhilasha Sharma**